



CENTRALE BANK VAN ARUBA

BCA a dicidi di mantene e reserva obligatorio na 24,0 por ciento entrante 1 di augustus 2022.

Relato di prensa

Conforme e tarea di e Comite di Maneho Monetario (CMM) pa evalua, determina y provee transparencia riba e accionnan di maneho monetario di Banco Central di Aruba (BCA), BCA ta comunica lo siguiente. Durante e reunion di 20 di juli 2022, CMM a dicidi pa mantene e reserva obligatorio na 24,0 por ciento entrante 1 di augustus 2022. Di e manera aki, e banconan comercial mester tene un balansa minimal na BCA cu ta igual na 24,0 por ciento di e depositonan riba termino cortico di nan clientenan. E decision aki ta basa primordialmente riba e caida y tendencia di bahada spera den e nivel di likides excesivo na e banconan comercial.

E CMM a considera e siguiente informacion y analisis den su deliberacion:

Reservanan internacional

Reservanan internacional, cu ta consisti di reservanan oficial di BCA y reservanan di divisa na e banconan comercial a subi cu Afl. 329,0 miyon (Grafico 1) riba 1 di juli 2022, compara cu fin di december 2021. E reservanan oficial a aumenta cu Afl. 233,5 miyon durante e mesun periodo, mientras e reservanan teni pa banconan comercial a subi cu Afl. 95,5 miyon. Consecuentemente, riba 1 di juli 2022, e reservanan oficial y internacional a suma Afl. 2.978,4 miyon y Afl. 3.458,6 miyon, respectivamente. Pa e resto di 2022, BCA ta premia expansion den e reservanan oficial y internacional debi na mas entrada di divisa relata na turismo y un recogemento den inversion procedente di exterior. Mantencion di un nivel adecua di reservanan (door di, entre otro, e reserva obligatorio) ta critico pa mantene e tasa di cambio fijo entre e florin Arubano y e dollar Mericano. Relata na esaki, BCA ta anticipa cu reservanan internacional lo surpasa ampliamente tres luna di pago riba e cuenta coriente di e balansa di pago (cu ta consisti di pagonan pa importacion, pago di interes na inversionistanan stranhero, y transferencianan pa exterior manera placa manda afo door di trahadornan stranhero).

Ta proyecta cu e reservanan oficial tambe lo permanece dentro di e margen acceptabel basa riba e metrico 'Assesing Reserve Adequacy' (ARA) di e Fondo Monetario Internacional (FMI) (Tabel 1). Actualmente, e nivel di reservanan di divisas a keda adecua door di e fluho di divisas ricibi door di Gobierno di Aruba na maart 2022 y e prestacion fuerte y continuo di turismo. Den e delaster parti di aña, Gobierno di Aruba lo uza e fluhonan aki pa paga fiananan internacional cu a vence.




Grafico 1 – Desaroyo den reserwanan oficial y internacional.

Tabel 1: Metriconan relata na reserwanan observa den 2022

	jan	feb	mrt	apr	mei	jun
Cobertura di pagonan riba cuenta coriente ¹	8,8	8,7	9,4	9,2	9,1	8,8
Metrico di FMI ARA ²	110,1	109,5	122,8	128,0	128,6	126,6

¹ E cantidad di luna di pagonan riba cuenta coriente cu e reserwanan internacional ta cubri.

² E proporcion entre e nivel di reserwanan oficial y e nivel mínimo adecua (conforme FMI), den porcentaje.

Inflacion

Na mei 2022, e Indice di Prijs di Consumo (IPC) tabata 5,2 por ciento mas halto compara cu e mesun luna di e año anterior (Grafico 2). E aumento aki tabata causa primordialmente door di e aumento den prijs di gasoline, cu a afecta e componente di ‘transporte’ (contribuyendo cu 2,6 punto di porcentahe). Ademas, otro componentenan a contribui na e inflacion, esta ‘cuminda y bebida no alcoholico’ (contribuyendo cu 1,0 punto di porcentahe), ‘operacion di vivienda’ (contribuyendo cu 0,5 punto di porcentahe), ‘pañã y sapateria’ (contribuyendo cu 0,3 punto di porcentahe), ‘restaurant y hotel’ (contribuyendo cu 0,3 punto di porcentahe) y ‘otro bienes’ (contribuyendo cu 0,3 punto di porcentahe).

Na final di mei 2022, e inflacion midi riba promedio di 12 luna a subi te na 3,0 por ciento y ta proyecta pa aumenta durante 2022 tanten cu banconan central no logra trece inflacion bou di control riba termino cortico y problemanan di abastecemento ta wordo resolti. Mientrastanto, na mei 2022, inflacion basico (excluyendo cuminda y energia) a yega 2,7 por ciento si midi e final di respectivo luna contra e luna di e aña anterior. Basa riba un promedio anual esaki a yega na 1,3 por ciento.

Grafico 2. Inflacion basa riba Indice di prijs di consumo
(Fuente: CBS, mei 2022)




Grafico 2: Desaroyo inflacionario

Likides excesivo na banconan comercial

E total di likides excesivo na e banconan comercial a baha di Afl. 1.320,5 miyon na december 2021 pa Afl. 1.037,7 miyon na mei 2022 (Grafico 3). E caida significante aki den likides excesivo ta debi primordialmente na e subida consecutivo den e reserva obligatorio door di BCA durante e prome cinco lunanan di 2022. No obstante, e nivel di likides excesivo a keda significantemente mas halto cu e nivelnan midi prome cu e pandemia (+ Afl. 348,6 miyon). Esaki tabata a causa di e nivel eleva di fondonan di likides (cu ta inclui cash, bononan di gobierno y otro activo likido) na banconan comercial, amplifica door di e nivel abou di demanda pa credito. Sinembargo, financiamiento local di proyectonan relata na turismo probablemente lo crece den e di dos mita di 2022. Esaki probablemente lo pone presion adicional riba e nivel di likides excesivo na e banconan comercial.

Grafico 3: Likides excesivo di banconan comercial den miyon di florin
 (Fuente: CBA)




Grafico 3: Desaroyo den likides excesivo

Banco Central di Aruba
 21 september 2022